

ARMEJ IN ISRAEL RAAR KABUÑ ÑAN JUON EKJAB

Köttöpar ko an katak in:

- Kwaļok bwe e jab eṃṃan aolep wāween kabuñ.
- Kwaļok bwe Anij e jeļā aolep men me armej rej kōṃṃani.
- Kwaļok bwe Anij e dike jerowiwī im kabuñ e bōd.
- Kwaļok bwe ad kijejeto e ban jipañ lōṃṃoren kōj.

Melele ko relap ilo katak in:

- Jen lo bwe armej re jab bōk lōṃṃoren kōn aer kajjioñ in kōjparok kien ko joñoul.
- Jen lo bwe eṃṃōj ad kōkkure kien ko an Anij, im ewor ruōd bwe jen mej.
- Jen lo bwe jej aikuj weepān bwe Anij en bōk kōj.
- Jen lo bwe Anij wōt e maroñ lōṃṃoren kōj kōn wānōk an Jijej.

Eṃṃōj an Anij liļok joñoul kien ñan ri Ju ro. Eṃṃōj An jiroñ er bwe ren kōjparok er aolep. Im ri Ju ro raar uwaak im ba ta? “Men otemjej Jeova ear kōnono, kōm naaj kōṃṃani.” Exodus 19:8

Mool ke bwe re maroñ kōjparok aolep kien ko an Anij? Mool ke bwe jabdewōt armej e maroñ kōjparok kien ko an Anij? Ñe jej kwaļok mool innām jenaaj aikuj uwaak im ba jab. Āinwōt juon ñe kwō jab tōmak men in kōnke Baibōl make ej kwaļok bwe ejjelok kanniōk enaaj wānōk imaan Mejan kōn jermal ko an kien, bwe jej jeļā jerowiwī kōn kien (Rom 3:20). Anij ear liļok kien ko joñoul ñan Moses ke ear pād raan toļ Sinai. Ke ri Ju ro raar kattar an roļ tok, raar kōṃṃan ta? Ilo katak in, je naaj lo joñan an ṃōkaj an ri Ju ro joļok aer tōmak Anij im rupe kien ko An.

1. Moses ear wanlōñļok ilo toļ Sainai.



Exodus 24:1 Im Ear ba ñan Moses, “Kwōn wanlōñtok ñan ippān Jeova, kwe im Aron, Nedab im Ebaihu, im jiljilimjuonñoul iaan rūtto ro in Israel, im koṃwin kabuñ ettoļok.

Ejab kien ko joñoul wōt im Anij ear liļok ñan ri Ju ro ilo iien in. Ear barāinwōt liļok ñan er elōñ kien kōn wāween kabuñ ñan E. Ear leļok ñan er juon plan kōn wāween kalek juon ṃōn kōppād im kōn wāween katok ñan E. Etke Anij ear kōṃṃani men kein? Ej kōnke eļap An yokwe armej.

Jān jinoin laļ in liktak jej lo bwe eļap an Anij yokwe armej. Meñe jaar kāālōt jerowiwī, Anij ej yokwe wōt kōj. Meñe jej ko wōt jān e, Ej kōple kōj bwe En bokwōje kōj kōn Peen yokwe. Ke Adam im Iv raar jerowiwī, Anij ear itok ñan ippāer ilo aemedļok in jota. Ke armej raar jerowiwī ilo tōr eo an Noa, Anij ear leļok 120 year ñan er bwe ren ukeļok im lōke wōt E. Anij ear barāinwōt kwaļok An yokwe ri Ju ro. E make ear kepaakļok er bwe En kwaļok ñan er iaļ ko reṃṃan im jimwe.

2. Moses wōt ear maroñ kepaakļok Anij.



Exodus 24:2 Im Moses wōt enaaj ruwaakļok ñan ippān Jeova, a re jāmin ruwaaktok, im armej ro re jāmin wanlōñļok ippān.”

Anij e kwōjarjar. Meñe emōj an lõmarein ippān Moses make kokwōjarjar er im karreoik nuknuk ko aer, raar jab maroñ kepaak Anij. Etke Moses wōt ear maroñ in kepaaklōk Jeova? Ta Moses ear kwōjarjar jān er ke? Jaab.

Unin bwe Moses ear maroñ kepaak Anij ej kōn an Anij jouj. Unin bwe jabdewōt armej e maroñ kepaaklōk Anij ej kōn jouj eo An. Jen lõmņak jidik kōn mour an Moses. Moses ear man juon ri Ijjipt. Ke Anij ear wałok ñan e ilo āne jemaden im kōnono ñan e jān ilowaan wōjke e urur, Moses ear jab kōnaan roł ñan Ijjipt. Ear jekpen im ba bwe ear jaje kōnono. Innām etke Anij ear kālōt e? Juon wōt uwaak - kōn An tūriamo im jouj!


3. Ri Ju ro raar jab lõke Jeova.



Exodus 32:1 Im ke armej raar lo bwe e ruņwij an Moses wanlaltok jān toł eo, armej ro raar kweilōklōk ñan ippān Aron im ba ñan e, “Kwōn jutak im kōmanman anij raņ ñan kōj, ro renaaj ilōk iņaad. Bwe kōn Moses in, armej eo ear āñintok kōj jān Ijjipt, je jaje e wajikōt.”

Eoon in ej kwałok jilu bōd ilo lõmņak ko an ri Ju.

Juon, wōn ear āñin lōk er jān Ijjipt? Moses ke Anij? Anij. Im ear wor jabdewōt iien ke Anij ear jab oņake aikuj ko aer im kōjparok er ke? Jaab. Ear kōjepel Lomało e Būrōrō. Ear man aolep ri tariņae ro an Ijjipt. Ear kawōtlōk manna jān lañ. Ear tōl er ilo raan kōn juon juur in baat, im ilo boñ kōn juon juur in kijeek. Ke ear to an jako Moses, raar lõmņak bwe ear bar jako Anij.



Ruo, raar rupe kallimur eo aer ñan Anij. Emōj aer ba ñan E bwe renaaj kōjparok aolep kien ko An. Ejab to an Moses jako im raar oktak jān Anij.

Jilu, raar kabuñ ñan Jeova ilo juon wāween e bōd.

4. Ri Ju ro raar kabuñ ñan Jeova Anij ilo juon wāween e jakkar.



Exodus 32:3-5 Im armej otemej raar utūk diede gold ko raar pād i lojilñeir, im bōktok ñan ippān Aron. [4] Im ear bōki jān peir im kōmanmani kōn kein kōmman, im ear kōmman koon in kau e oņlōk; im raar ba, “Rein anij ro aņ, O Israel, ro raar āñintok eok jān āneen Ijjipt.” [5] Im ke Aron ear lo men in, ear kōmman lokatok iņaan, im Aron ear kwałok im ba, “Ilju enaaj kwōjkwōj ñan Jeova.”

Elōñ rej lõmņak bwe ri Ju ro ilo iien in raar jołok aer kabuñ ñan Jeova Anij. Bōtab eoon kein rej kwałok bwe raar kabuñ ñan wōn? Aet, raar kōmman juon ekjab ilo jekjekin juon kau, bōtab ekjab in ear jutak kōn wōn? Ear jutak kōn Jeova.

Aron ear kwałok im ba, “Ilju enaaj kwōjkwōj ñan Jeova.” Ri Ju ro raar kabuñ wōt ñan Jeova, bōtab raar kabuñ ilo juon wāween e jakkar.

Elōñ ilo raan kein rej ba, “Āinwōt juon wāween aṃ kabuñ ñan Anij, ijo wōt ke, kwōn kabuñ ñan Anij.” Ekwe, juon kajjitōk. Ewi wāween aṃ kwaḷok aṃ yokwe juon armej? Kōn aṃ kōṃṃmani men ko me rej kabuñbūruon. Ejjeḷok tokjān aṃ ba bwe kwōj yokwe juon armej eḷaññe kwō abwin kabuñbūruon.

Kein ear kabuñ ñan Anij, bōtab Anij ear jab ṃōṃōṃō kake e. Bwe? Kōnke ear bōd kilen an Kein kabuñ. Anij ear jiroñ Noa bwe en jekjek juon wa. Anij ear jiroñ Noa kōn wāween jeke wa eo. Eḷaññe Noa ear jab ḷoore men ko Anij ear ba, innām e ban kar mour.

Elōñ bwijin bwijin kain kabuñ im elōñ bwijin bwijin iaḷ ñan Anij. Āindein an elōñ ba. Bōtab Baibōl ej ba bwe elōñ juon wōt iaḷ ñan Anij. Ñe Anij ej jiroñ kōj bwe jen kōṃṃmane juon men, Ej barāinwōt jiroñ kōj kōn kilen kōṃṃmane. Ejab ba, kabuñ wōt im ṃōj. Jaab. Ej ba kabuñ ñan Eō ilo wāween in, im wāween in wōt.



Rom 10:2,3 Bwe ij kōnnaan kōn er, bwe ewor kijejeto ñan Anij ippaer, a e jab ekkar ñan jeḷā. Bwe kōn aer jaje wānōk an Anij, im pukot bwe ren kapen aer make wānōk, raar jab kōttāik er ñan wānōk an Anij.

Ilo eon in Paul ej kōnono kōn ro ri Israel. Raar kijejeto ñan Anij, ak raar jab mour. Etke? Raar jab meḷeḷe wānōk an Anij. Raar kajjioñ in kapen aer make wānōk. Raar jab jeḷā bwe e ban tōprak men eo. Joñan an Anij wānōk, ejjeḷok jerowiwī ñan jidik e maroñ pād Ippān. Elmān ad bōk wānōk eo an Anij? Kōn tiljek ak niknik ñan jemḷoken, ke ta? Uwaak eo e pād ilo 4 eon.



Rom 10:4 Bwe Kraist e jemḷoken kien ñan wānōk ippān ro otemjej rej tōmak.

Ad kijejeto e ban jipañ kōj bwe jen Kristian. Eḷaññe je jab kabuñ ñan Anij ilo wāween in, innām je jab maroñ kabuñ ñan Anij. Ilo bar juon wāween ba, eḷaññe jej kajjioñ jibadek ḷok mour indeeo im wānōk kōn jabdewōt bar juon iaḷ ijellōkun tōmak Jisōs Kraist im E wōt, innām Anij e ban kile ad kabuñ ñan E, jekḷoḷon joñan ad kijejeto.



Galetia 5:3,4 Aet, ij bar kōnnaanōk jabdewōt armej eo ej ṃwijiṃwiji, bwe e ri ṃuri in kōṃṃman aolepen kien. Koṃ jepel jān Kraist, jabdewōt iaami, koṃ kōṃnaan kowānōk koṃ ilo kien; koṃ ar buñḷok jān jouj.

Eḷaññe jej ḷōṃṃak bwe je maroñ wānōk imaan mejān Anij kōn ad kōjparok kien ko An, innām je buñ jān jouj (meḷeḷein, je jab pād ilo jouj an Anij). Eḷaññe jej ḷōṃṃak bwe jej aikuj kōjparok juon ak jet kien bwe jen wānōk, innām jenaaj aikuj kōjparok aolepeir. Etke jet rej ba bwe kwō ban kadek im ka-baatat im Kristian, ak re jab ba bwe eḷaññe e utiej būruon juon ak eḷaññe ej dike armej innām e ban Kristian? Eḷaññe juon ej ḷōṃṃak bwe ewor jet kien me ej aikuj kōjparoki bwe en Kristian, innām ej aikuj kōjparok aolep kien ko.

5. Jeova ear kajeik ri Ju ro kōn wāween aer kabuñ ñan E.



Exodus 32:10 Innām, kiiō, kwōn jab eḷtok, bwe Aō illu en bwil ṃae er, im bwe In kōkkure er; im Inaaj kōṃṃman jān kwe juon bwij eḷap.”

Anij ear kōṃnaan ṃan aolep ro ri Israel im kōṃṃman juon aelōñ ekāal jān Moses! Bōtab kōn an Moses jar im kajjitōk bwe Anij en jab ṃan er, Anij ear ba bwe E ban ṃan er.



Exodus 32:25-28 Im ke Moses ear lo bwe armej ro re jeļmāne, (bwe Aron ear kōtļok er ñan kajjirere an ro ri kōjdat er), [26] Innām Moses ear jutak ilo kōjām in kamp eo im ba, “Eo ej rie Jeova, en itok ñan ippa.” Innām ro nejin Livai otemjej raar kweilokļok ñan ippān. [27] Im ear ba ñan er, “Āindein an Jeova Anij in Israel ba, ‘Jabdewōt armej en likūt an jāje i ipin, im ito-itak jān kōjām ñan kōjām ilo kamp eo, im jabdewōt en ñan jein im jatin, im jeran, im ri turin.’” [28] Im ro nejin Livai raar kōmman ekkar ñan naan in Moses, im raar mej ilo raan eo, e nañin 3,000 armej.

Ejjeļok kajjitok bwe Anij e dike jerowiwī. Ejjeļok kajjitok bwe Anij ej illu ippān ro im rej kabuñ ñan E ilo juon wāween e jakkar. Eṁōj an Anij kōmmane juon karok ñan lomooren armej. Ejjeļok ad pepe ilo men eo. Je jab maroñ ukōte bwe en pidodo ļok. Je jab maroñ ukōt bwe en limo ļok ippād. Anij wōt e maroñ lomooren kōj. Kōn men in, jen pukot wōt iaļ eo An, im roñjake wōt naan ko An.

Kajjitok ko

1. Anij ear lilok jete kien ñan ri Ju ro ilo dekā ko?
2. Ke Anij eaar jiroñ ri Ju ro bwe ren kōjparok kien ko An, raar ba ta?
3. Anij ear lilok kien ko joñoul ñan Moses tu ia?
4. Moses ear maroñ kepaakļok Anij kōn ear lukkuun in kwōjarjar?
5. Etke Moses ear maroñ kepaakļok Anij?
6. Etke ri Ju ro raar kōnaan bwe Arōn en kōmman ñan er juon ekjab kein aer kabuñ?
7. Wōn ear lomooren er jān Ijpt, Moses ke Jeova Anij?
8. Ri Ju ro raar kallimur ñan wōn bwe renaaj kar kōjparok kien ko an? Moses ke Jeova Anij?
9. Arōn ear kōmman ñan er juon ekjab annañin juon ta?
10. Ri Ju raar kabuñ ñan wōn, ekjab ke Anij?
11. Innām etke Anij ear illu ippāer?
12. Ewi bar juon me ear kabuñ ñan Anij, ak ejakkar wāween an kabuñ?
13. Eļāñne jej ļōmņak bwe ewor jet kien im jej aikuj kōjparoki bwe Anij en bōk kōj, innām jej aikuj kōjparok jete kien?